



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 7

Alex De Minaur-i ATP Acapulco Open kokogo

Trump-i Republican nomination angutsü anameta nung lir



VOL. XXI ISSUE NO. 141 (ADOK 141) DIMAPUR TENTONÜ (MONDAY) METSÜREMI (MARCH) 04, 2024 ₹ 5.00

Centre-i 'Viksit Bharat 2047' atema renemer

New Delhi, March 3, 2024 (Agencies): Prime Minister Narendra Modi-i Deobarnü 2047 atema Vision India document ka sayaogo.

Tanü Council of ministers senden ka nung PM Modi-i 2047 tashi nung "Viksit Bharat" (Developed India) kümdaktsüsbaji tongtipang lir ta ashi.

Iba sentong nung sensotem tashi itdaktsütsü aser rongsenekzüng jenjang tajungba akümtsü alizüng lir. Küm 25 sentong ajanga India ya alima nung terenlok aliba linük ka akümtsü nükjiding lir.

December 2021 nungi January 2024 tashi ministry balala nung senden 2700 tema amenba sülen vision document renemogo. Centre sorkari recommendations 450 repringdangogo aser sendaktepa alir 15 den asüngdangyago.

Tanü senden nung ministers o departmental secretaries aden aser Prime Minister Modi-i parnok den ghonda ka jembia.

India nung technologies ajungkettsü aser purapitba nung alima len anitsü atema Budget nung Rs 1 lakh crore enoktsü indang PM Modi-i jembia.

Department shia nung Viksit Bharat shisatokden alitsü aser ideas o action plans renemtsü atema PM Modi-isa metedaktsü. Iba olemtep nung CII

(Confederation of Indian Industries) aser FICCI (Federation of Indian Chambers of Commerce & Industry) amala Business bodies dendaktsütsü ta paisa ashi.

PM Modi-isa minister aser ketdangsurtem dang tesüiba nung lemtet balala agiba metettsü atema pei pei ministry tem records repringtsü metedaktsü.

Tesüiba küm 25 tsüngda tebilemba melenshitsü angatetsüla ta paisa ashi. PM Modi-isa maximum government aser minimum governance indangjembia.

2024 Lok Sabha elections atema BJP-i mezüng candidates 195 osang metedaktsüba sülen PM Modi-i par Council of Ministers den senden amen.

Senden nung Narendra Modi-i minister tem dang election mapang nübortem teyari angutsü atema mapa inyaktsü ayongzüük. "Asenoki election nung takok anguba sülen tanaben ajuruteptsü" ta pai ashi.

2024 Lok Sabha elections nung BJP kijai menden 370 nung takok angutsü aser taküm-a NDA atema menden 400 bosa angutsü ta Narendra Modi-i metedaktsüogo.

Madhya Pradesh nung rally ka nung jembidang "BJP züngsem shiai booth shia nung votes 370 ngutetra ibaji takoktsü lir" ta PM Modi-i ashi.

Tuensang nung sorkar garitem mesenzüdaktsütsü

Dimapur, March 3, 2024 (Agencies): Chang Wedoshi Setshang (CWS)-i state sorkar anema lungkak aitba maneni March 4 nungi sorkar garitem mesenzüdaktsütsü.

"Higher Education Minister aser Department-i nangzükbama meinyakba atema March 4, 2024 anepdang 10:00 ako nungi tenzüker sorkar garitem

mesenzüdaktsütsü" ta CWS-i Tuensang Deputy Commissioner dangi shidi ka züluogo.

Ajisüaka CWS-i iba tenokdangba kübok Administration, Medical, Fire & Emergency, Police, Home Guard & Civil Defence, Nagaland State Transport (NST) garitem aser College Bus tem medendaktsütsü ta shiogo.

CBI-i Manipur nunger 7 anema chargesheet benok

Guwahati, March 3, 2024 (Agencies): Central Bureau of Investigation (CBI)-i Guwahati nung aliba Kamrup (Metro) chief judicial magistrate tsüngdang nisung 7 anema chargesheet ka benokogo.

August 3, 2023 nü Manipur kübok Bishnupur district nung prangpong-injang aika auya bener aoba dak sendakba nung CBI-i chargesheet agütsü. Iba anogo 2nd Indian Reserve Battalion headquarters nungi prangpong-injang aikatem auyazüka bener ao.

CBI-i Laishram Prem Singh, Khumukcham Dhiren (Thapka), Moirangthem Anand Singh, Athokpam Kajit (Kishorjit), Loukrakpam Michael Mangangcha

(Michael), Konthoujam Romojit Meitei (Romojit) aser Keisham Johnson (Johnson) nunger anema ken o benok.

Yaküm August 3 nü nisung telok kati battalion headquarters nungi prangpong 300 tema, injang 20,000 rounds aser military equipment auyazüka bener ao ta charge sheet nung shia lir.

Manipur nung May 3, 2023 nü kin o kin tsüngda raratsü tenzüker tasurtem Churachandpur nung lisopurtemi aremstü sentong ka agidang 2nd Indian Reserve Battalion headquarters nung nisung telok ka Churachandpur leni aotsü atema adenshia liasü.

Nagaland nung tanur lakh 1.55 nem polio mozü jemdaktsütsü



H&FW Principal Director Dr Ritu Thurr-i kinü tanur ka nem polio mozü jemdaktsüdag agiba noksa angur.

Kohima, March 3, 2024 (TYO): Deobarnü Nagaland nunga National Immunization Day amongdang beneficiary lakh 1.55 tema nem polio mozü jemdaktsüogo.

Tanü Urban Public Health Centre, Seikhezou nung Health and Family Welfare Principal Director Dr Ritu Thurr-i kinü tanur ka nem polio mozü drop ana jemdakja programme tenzüük. Nagaland ajungalen booths 1550 nung tanur nem polio mozü jemdakja liasü.

"Immunization ajanga vaccine agi noktangtet tashidak 13 nungi kümzüka ayur" ya Dr Thurr-i ashi.

"Centre sorkari vaccines angati agütsür aser India nung

immunization programme ya alima nung tulutiba lir kechiyong tanur million 27 aser mashisa aliba tetsür million 30 nung rangoker mapa inyaker" ta pai ashi.

Iba immunization programme takok ngua agitsü atema Centre sorkari kümshia Rs 20,000 million shi endoker, ta Dr. Thurr-isa ashi.

Iba immunization programme indang nükjidingi kinü tanurtem aser mashisa aliba tetsütem vaccine preventable diseases nungi kümzüka ayutsüba lir, ta paisa metedaktsü.

Poliomyelitis samatsütsü nükjiding nung Centre-i 1994 küm Pulse Polio Immunization (PPI) programme tenzüük aser

ibaji 1999 nung Intensive Pulse Polio Immunization (IPPI) ajungket, ta Dr. Thurr-i ashi.

"March 2014 nung asen linük aser SouthEast Asia ya polio free ta sangoktsü aser tanü tashi India nung polio tashidak mali. Saka asen kidanger linüktem Pakistan aser Afghanistan nungbo tang tashi wild polio virus lir. Anungji asenok mekümdangra mashii mapang ka nung menatsü akok" ta paisa ashi.

"Nagaland tesem balala nung polio booths 1550 ajanga arishi küm 5 ser teküpok tanur 1,55,550 nem mozü jemdaktsütsü alizüng lir. Iba mapa takok angutsü atema NGOs, arogotem aser village councils-i yariteptsü mepishir" ta Dr. Thurr-isa ashi.

"Deobarnü polio booths nung polio mozü jemdaktsütsü aser Mongulbar tashi home-to-home campaign inyaktsü" ta State Immunization Officer, Directorate of Health & Family Welfare Dr Imkongtemsu Longchar-ia ashi.

Iba sentong nung CMO Kohima Dr Leamnyie Konyak menden liasü aser Khedi Baptist Church Pastor Dr Ruokuovilie Sachü-i temoatsü meshia sarasadem.

Küm 14 nung P.Shilu Park aser 'Footbridge' tilaka merenemteter : Tongpang Ozüküm

Kohima, March 03 (TYO) : Nagaland state kümer mezüng Chief Minister Wb.P.Shilu Ao nem akhüm agüja bilemtettsü asoshi 2010 küm Urban Development department ajanga Mokokchung town nung P. Shilu Ao Memorial Park yanglu tenzükbama mapa ka, tang tashi merenemteter lir aser merenem dang yongi iba kiojenbo raksa tenzükogo ta Nagaland nung Advisor, Water Resources aser Angetyongpang Constituency nungi adoksang MLA Wb. Tongpang Ozükümi metedaktsü.

Pai iba o ya taoba hopta Nagaland tatar senden nung o lemtet mapang metedaktsü. "Ni iba park ya oa semdangogo aser joko merenem dang yongi raksa tenzükogo, anungji ano tanaben estimate ka yanglushir Nagaland kümer küm 60 ajungnung amungba mapang yabosa renemdaktsür," ta paisa mepishia metedaktsü.

Kasa senden nung Tongpang Ozükümisa taküm 2024 küm nungi Mokokchung district nung Chang aser aser Phom yimtem ajak nem DUDA scheme nungi senotsü teyari agütsütsü government sentong nung enokba asoshi Chief minister



Wb. Tongpang Ozükümi

apu ka yanglutsü atema Urban Development department-i tenzükbama mapa ka sen lakh 52 bo agizüka agir tongshi-ang ana azünger mapa anena lir, anungji iba mapa ya tasen küma khen tenzüka inyaktsü nüngdaker ta metedaktsü.

Kasa mapang tatar senden nung shilem agi jembidang, Tzüdikong aser Chuchuyimlang ama Urban Sub-Division-tem ya Town Council küma terenlok mapatem inyakdaksüner ta Tongpang Ozükümisa metedaktsü.

Naga nunger India telongjem kübok state balala nung sükshia aliba nübortem aser alinüktem ajak ya ka küma longjemtsü asoshi Nagaland tatar senden nung 1964, 1970, 1994, 2003 aser 2015 kümtem nung bangzüngsa bangzüng zünga aser akangshia aruogo aser Naga yimten tebilemstü latettsü asoshi Nagaland yimten yimsürtemi tajurutsü purtem ajak den jembia arudagi, anungji iba tangatba nung ano maneni telemtetba tajung kati maru tashi meranga inyakdi ta Nagaland Water Resources Advisor, Tongpang Ozükümisa külem tatar medemertem ayongzüük.

State kübok tesem balala nung IPPI sentong agiogo



(Noksa achichilen) Peren nung polio drop mezüngbuba Rajesh Monsang, PO, UNDP ajanga agütsüba noksa nung angur. (Noksa abelen) Watsü Mungdang tir S Arenla Longkumer-i March 3, 2024 nü Mokokchung nung polio drop mezüngbuba agütsü dang tangokba noksa nung angur.

Dimapur, Metsüremi/March 03 (TYO): Linük ajunga den külemi Nagaland nunga tesem balala nung Deobarnü Intensified Pulse Polio Immunization (IPPI) sentong agia liasü.

Mokokchung jila nunga iba maparen tenzüka sentong ya Imlong Palace nung agia liasü.

Chief Medical Officer, Mokokchung, Dr Kibangkumba-i iba sentong tenzüka jembidang, India nung polio tashidak maliba jenjang mesamadaktsüsü atema Government of India-i IPPI sentong maneni ayongzüker aser 1995 sülen linük nung ibai sentong tulutiba alitsü, ta shi.

Watsü Mungdang tir S Arenla Longkumer-i polio drop

mezüngbuba agüja liasü. Mokokchung district nung tila tanur arishi küm 0-5 tsüngta alir 5443 nem iba mozü ya jemdaktsüsü nükjidong nung IPPI booth 214 amenoka liasü.

Peren nunga iba sentong tenzüka Dr Spongmenla Walling, DPO (RCH & UIP) Peren ajanga jembidang, India nung polio tashidak meliaka linük kar nung iba tashidak ya lir aser asen linükia meyipa arutsü akok, iba yongji tanurtem iba tashidak nungi kumzüka alitsü mechi mapang shia India nung polio mozü ya agütsür, ta ashi.

Lai tanur nem vaccine agütsüsü ya kanga tongtipang ta ashi aser takum anema aser

junga alitsü atema pei dak nungi tenzüksüla, ta ashi.

Lai tsürabor aser health workers tem dang Medical department ajanga maparen balala inyakba indang awareness prokshiba nung ambassador ka-ka ama alitsü ajungmesoa liasü.

Peren nung IPPI sentong tenzüka Ndazeung Hingleu, Children Co-ordinator, JTLBC ajanga Lai zünga sarasadem.

Peren district nung tila tanur arishi küm 0-5 tsüngta 6975 nem iba mozü agütsüsü nükjidong nung booth 155 amenoka liasü.

Peren nung polio drop mezüngbuba ya Rajesh Monsang, PO, UNDP ajanga agüja liasü.

NSCN/GPRN-i Naga nunger aliba tesem nungi LGBTQ nisungtem ainshitsü tuyur

Dimapur, Metsüremi/March 03 (TYO): Bendang lima nung amshiba sobaliba aser yimya balala ajanga mapang shia Naga nunger puatsü meranga takum nung yimya tamajungtem amshir, koba ajanga Naga nunger mulungsentsü, sobaliba aser tamangba yimsü den mapeter, ta NSCN/GPRN sangdong ka ajanga ashi.

Lesbian, gay, bisexual, transgender, queer (LGBTQ) ya Naga nunger asoshi tasen aser kodanga mangashidangba ka lir aser iba ya Naga lima nunga tetsüng ajemoktsü meranga Naga nunger, talisa lanurtem tekolok shisatsü aser mulungsentsü menentsür.

Temenen nükjidong ya teti nunga tajung ka ama nisung ashiokja arur.

Iba yagi Naga nunger tangatetba nung timtem tulu agütsüba kisüng masü saka Khristan yimsü tesayuba anema lir, ta NSCN/GPRN sangdong ajanga ashi.

Iba amala tesempatsü yimya ajanga asen sobaliba aser tamangba yimsü jenjang tajung melenba nung NSCN/GPRN mango-memetet ama malitsü.

Khristan ka ama Naga nungeri dangalen nungi asen lokti tesedaktep raksatsüsü aruba nisungtem (non-locals) nem tatok magütsüsü. Iba ama temenen tashi ajanga asen lokti

samatsüsü merangba nung arogo tem densema Naga nunger saksalema alitsüla aser lanurtem nem

angatekdaktsüsüla, ta sangdong ajanga ashi.

Asen lokti wazüka ayutsü tangatetba nung NSCN/GPRN ajanga non-locals shirnok tesem balala nungi LGBTQ osang sangdonga aser ajungmesoa arua ali, parnok Naga nunger aliba tesem nungi anogo asem tsüngta ainshitsü metetdaktsür, ta NSCN/GPRN sangdong ajanga ashi.

Iba totuyuba sülen manidakba ajanga mepetmesü mesüra timtem kar adokra, NSCN/GPRN khuret masütsü, ta sangdong ajangasa ashi.

DC & District Magistrate, Kohima ajanga metetdaktsür

Dimapur, Metsüremi/March 03 (TYO): Sorkari agia aliba ali temelaba makai belenshitsu/ayoktsü ozüng agi memelar aser tapet ozüng kübok merenshitsu, ta Deputy Commissioner & District Magistrate, Kohima,

Kumar Ramnikant, IAS ajanga sangdong ka nung metetdaktsü.

Lerie aser New Kohima College area nung Government Acquired Land kübok aitba ali ayongba aser aliba nung shilem agirtem asoshi pei juri khuret

asütsü. Anungji iba ama temulung melemteti ali ayokba aser aliba lira tekeratiba nung ketdangsürtem dang revenue.dc.kohima@gmail.com ajanga metetdaktsüsü ayongzüker, ta sangdong ajanga ashi.



March 1, 2024 aonung Mokokchung district nung Longchem sub-division kübok Lizo yimdak arem shidi adoka farm aser ki o jen raksaja nübur rokongdar. Iba ama arem shidi mapang aben yimsüng aser farm ki o jen raksa dang sorkar-i nübur nem teyari agütsüsüla.

CBI-i Assam nung nisung 7 anema ken o benok

Guwahati, Metsüremi/March 03 (Agencies): Central Bureau of Investigation (CBI) ajanga Guwahati, Assam nung aliba court of Kamrup (Metro) chief judicial magistrate matsüngdang nisung tenet (7) anema ken o ka benokogo.



Manipur kübok Bishnupur district nung aliba 2nd Indian Reserve Battalion nungi August 3, 2023 nü prangbong aser injang aika auyaba dak sendakba nung iba ken o ya benoka liasü.

Iba ken o nung tai tonglokja alirtem ya Laishram Prem Singh, Khumukcham Dhiren (alias Thapka), Moirangthem Anand Singh, Athokpam Kajit (alias Kishorjit), Loukrakpam Michael Mangangcha (alias Michael), Konthoujam Romojit Meitei (alias Romojit), aser Keisham Johnson (alias Johnson) nunger alitsü.

Ken o nung ashiba agi, taoba küm August 3 nü nisung telok kati battalion indang headquarters nungi prangbong 300 dak tema aser injang 20,000 jungnüa auya bener ao.

Taoba küm May 3 nü Manipur nung kin balala tsüngta mepetmesü adoka azüdokshiba mapang tepsetba nisungrtem aremetsü asoshi Churachandpur nung sentong yanglua alidaki aotsü atema nisung telok ka 2nd Indian Reserve Battalion indang headquarter nung adenshia liasü.

Arunachal: LS election atema BJP-i Kiren Rijiju aser Tapir Gao shim



Kiren Rijiju

Tapir Gao

Itanagar, Metsüremi/March 03 (Agencies): Arunachal Pradesh nungi aruya aliba Lok Sabha elections nung tokteptsü atema BJP ajanga Honibarnü tejangja nübu ana shimogo.

Union Minister Kiren Rijiju aser Arunachal Pradesh BJP tir Tapir Gao na pei-pe constituency nungi tokteptsü shimteta liasü.

Ato Kilonser Narendra Modi sorkar nung Earth Sciences Minister inyaksang Rijiju ya maneni Arunachal Pradesh West menden nung tokteptsü, koba pai 2004 nungi amiter arur. Iba menden ya khi dang (2009 nung) Congress telok nungi Takam Sanjay-i rakzükteta lir.

University of Delhi nungi law graduate, Rijiju ya Law Minister ama inyakdang mangatettep kar adoka liasü.

2022 küm pai obendanger shimba atema collegium system aitsü aser iba ya asüngteta mali ta ashi.

Pai maneni obendanger menden nungi anisüngzüka alirtem "Anti-India gang" nung sendaktepa aliba indang March 2023 nung tasü ita jembia liasü.

Iba sülen taoba küm May 18 nü pa nem Ministry of Earth Sciences portfolio mapa melenoktsü.

Kasa mapang Tapir Gao ya East Lok Sabha constituency atema shima liasü.

Gao yagi iba constituency

nungi 2004 küm takok angu, saka 2009 aser 2014 election nung tamakok ajurur 2019 election nung takok ngua iba menden tanaben agiteta liasü.

March 2, 2024 nü Changlang nung Tangha Tang Welfare Society (TTWS) ajungben senden ka mena Assembly Election 2024 atema jembia liasü.

Iba senden nung 52-Changlang South (ST) Assembly Constituency atema toktepnüa alisang BJP candidate Hamjong Tangha yaritsü TTWS Executive Body ajanga mulungsoa lemtet.

Iba society indang tejangraba aser constituency ajungtsü mechi lenmang balala asadanger iba telemtetba ya agia liasü.

Executive Body ajanga Tangha kidong nungi adokba candidate kisüng yaritsü jembia.

Parnoki lenir melentsü kanga tongtipang ta angatet. Muklom kin nungi tang MLA inyaka alisang yagi human resources development, ki o jen maparen aser lenmang tesedaktep senzüka yutsür ta aitsür, shibai tesüiba küm 25 tashi iba constituency menden nung mena aru.

52-Changlang South (ST) Assembly Constituency nungya Jugli, Muklom, Havi aser Tutsa densema Tangsa sub-tribes balala nungi voters 6,000 shi lir.



February 03, 2024 nü Bengaluru nung BJP indang 'Viksit Bharat Sankalp Patra' campaign tenzükba sentong nung BJP lenir Malavika Avinash adenba noksa nung angur.

PM Modi-i linük yangertsü atema tenla agüjang ta mepishi

New Delhi, Metsüremi/ March 03 (Agencies): Amongnü Ato kilonser Narendra Modi-i Bharatiya Janata Party fund atema sen 2,000 tenla agütsü aser nüburttem danga iba mapatong nung shilem agiang, ta ajungshio. Pai sen 2,000 tenla agütsüba receipt ji X ajanga lemsatapa Modi-i, "@BJP4India aser terenlok India yangerba tashi itshitsü atema tepela nung tenla agütsüogo. Ni ajak dang NaMoApp ajanga #DonationForNationBuilding nung shilem agitsü mepishir," ta metetdaksü. Taküm April-May ita nung Lok Sabha election agitsü lia Ato kilonseri Viksit Bharat Sankalp

Patra' campaign atema party nem tenla agütsür. Taruba Lok Sabha election atema BJP-i candidate tem tenüng mezüngbuba list sangdongogo. BJP-i mezüngbuba shilem nung state 16 aser Union Territory ana nung candidate 195 tenüng sangdongogo; parnok rongnung Modi aser Home Minister Amit Shah na densema lir. Mezüngbuba list nungji Union aser state level nung minister 34 densema lir aser Lok Sabha Speaker Om Birla-a densema lir. Mezüngbuba list nungji Uttar Pradesh nung Lok Sabha menden 51, West Bengal nung menden 20 aser Delhi nung menden pongu atema tenüng

sangdong. State 16 aser Union territory ana nung shimba party candidate tem rongnung tetsür 28 aser party nung lanur lenir 47 densema lir. Union minister tem rongnung mezüngbuba list nung densema alirtemji Rajnath Singh, Bhupender Yadav, Mansukh Mandaviya, Sarbananda Sonowal, Kiren Rijju, Jyotiraditya Scindia, Arjun Ram Meghwal, G Kishan Reddy, Arjun Munda aser Smriti Irani nung lir. Narendra Modi-i Varanasi menden nungi tokteptsü, Home Minister Amit Shah-i Gandhinagar nung, Health Minister Mansukh Mandaviya-i Porbandar nungi aser Sarbananda Sonowal-i Dibrugarh Lok Sabha menden nungi tokteptsü.

Bengaluru nung bomb lendong ken o NIA nem agütsütsü: Siddaramaiah

Chikkamagaluru (Karnataka), March 03 (Agencies): Amongnü Congress lenir tain aser Karnataka chief minister, Siddaramaiah-i, nüngdak dang süra Bengaluru nung aliba Rameshwaram Café nung bomb apokba lendong ken o bushisüngdangtsü atema National Investigation Agency (NIA) nem agütsütsü, ta metetdaksü.



Siddaramaiah

March 1 nü Brookefield nung aliba restaurant nung bomb apokba lendong nungji nisung 10 yirua liasü, saka tang tashi nung shinga mapu. Chief minister-i, tang iba tatalokba ken o ya Central Crime Branch (CCB)-i bushisüngdangdar, ta metetdaksü. Iba tatalokba ken o ya NIA nem agütsütsü, ta BJP-i ahangba dak sendakba nung Siddaramaiah-i, "Onoki ajidangdi. Bushisüngdang tenzükogo. Tang tashi nung shinga mapu. Nüngdak dang süra iba tatalokba bushisüngdangtsü atema NIA nem agütsütsü," ta metetdaksü. BJP-i, Bengaluru ya Brand Bengaluru masü saka "Bomb Bengaluru" kümogo, ta BJP-i aitsüba dak sendakba nung

Siddaramaiah-i, "BJP yimsüsüba mapang nung bomb pezü apok, süra asenoki iba dangjia kechi ajatsü? Mangaluru nung cooker bomb apokba tu shirnok yimsüsüba mapang nung liasü? Malleswaram nunga BJP office kima bomb apok. Iba mapang nung tu shirnok sorkar liasü? National Investigation Agency aser Intelligence Bureau ji shirnok kübok lir? Ibaji parnok tamakok masü no?" ta asüngdang. "Bomb apokba tatalokbaji ni pu-masemer. Ni ibaji aitsür saka BJP-i iba nungji yimtenren maitdaksütsü. Bomb apokbaji tilateri tatalokba masü. Sorkari teti agia item ama tatalokba ya süoki ia agir. Nüburttem kümzuka alitsü atema security ya kanga tongtibang," ta paisa shisem.

BJP MP, Harsh Vardhan-i yimtenren toktsür

New Delhi, March 03 (Agencies): BJP MP aser taoba mapang Helath & Family Welfare Union Minister inyaksang, Harsh Vardhan-i yimtenren toktsüogo. Taruba Lok Sabha election nung pa indang Chandni Chowk constituency nungi tokteptsü atema pa tenüng meshimba sülen Amongnü pai yimtenren toktsütsü sangdongogo. X ajanga Vardhan-i, pai pa tera dangi tanaben meyiptsü, ta metetdaksü. "Ni maneni moko aser temesepba mozü achiba anema inyaksü, climate change anema inyaksü aser taküm libaliro

tongmelang alitsü atema sayutsü," ta pai metetdaksü. "Küm 30 dak tema yimtenren nung aliba mapang ni assembly election ponguprong aser parliamentary elections ana nung toktepa ajak nungji takok tulu nguteta liasü. Iba mapang nungji party organisation, state aser Centre sorkartem nung menden balala nung liasü. Tatamsa ni tanaben kü tera dangi meyiptsü," ta pai X ajanga metetdaksü. Taruba Lok Sabha election atema BJP-i candidate 195 sangdongogo aser Vardhan indang Chandni Chowk Lok Sabha menden nungi tokteptsü atema

BJP-i pa masü saka Praveen Khandelwal tenüng ang sangdong. Taoba mapang Union health minister, Vardhani, "Küm 50 tejaklen ni GSVM Medical College, Kanpur nung MBBS azüngba mapang nung sensakertem aser nüngdakbapurtem yaritsü tejangraba nung kü omenji 'meimchirtem tenzüksü' liasü," ta metetdaksü. MP, Vardhan-i, "Ni nüburttem tenzüksü jangraba ama tenzükogo, ta ni mesasai shiteter. Ni Delhi Health Minister-a inyakogo aser Union Health Minister anaben inyakogo," ta ashi.



February 03, 2024 nü Ludhiana district nung Delhi Chief Minister Arvind Kejriwal aser Punjab Chief Minister Bhagwant Mann nati School of Eminence semzüksüsdang tangokba noksa nung angur.

APPENDIX- IV-A
 [See proviso to rule 8 (6)]
Sale Notice for Sale of Immovable Properties

Securitisation and Reconstruction of financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rule 8(6), 6(2) & 9(1) nung ajemdaker Kiojen ayoktsü atema E-Auction Sale Notice agütsür. Public, talisa sen apur (tem) aser Guarantor (tem) dang, Secured Creditor dang mortgage süa aliba tsünglanglen shia aliba kiojen Authorised Officer of Indian Bank (taoba mapang Allahabad Bank), Dimapur Branch Secured Creditor-i agiadokogo ta sangdonger, aser sentsüh **Rs. 43,39,169/- (Rupees Forty Three Lakh Thirty Nine Thousand One Hundred and Sixty Nine Only) (17.07.2023 tashi nung)** den sen tetemlok, costs aser tanga teindokba senotsü Indian Bank (taoba mapang Allahabad Bank), Dimapur Branch, Secured Creditor nem tagütsütsü aliba **Mrs. N. Sashila Jamir, W/o Mr. Pallav Kumar Sharma, Address: Ward No. 20, House No. 854 (A) C-Khel Half Nagarjan Dimapur, Nagaland, Pin-797112 and Mr. Pallav Kumar Sharma, Address: Ward No.20, House No.854 (A), C-Khel Half Nagarjan, Dimapur, (Nagaland), Pin-797112 (Borrower); Mr. Kilemsungba Ao, Address: House No. 48, near Ao, Church Imkonglenden Colony, P.O. + P.S. - Dimapur (Nagaland), PIN- 797112 (Guarantor); T. Asemdangba, Address: House No. 06, Airport Road, Aoyimti, P.O. + P.S. - Dimapur (Nagaland), Pin-797112 (Guarantor); Mrs. K. Tainla, Address: House No. 873, C Khel Kuda Village, Nagarjan, P.O. + P.S. Dimapur (Nagaland), Pin-797112 (Guarantor) and Mr. Takosashi, Address: Near Welcome Gate Imkonglenden Colony, P.O. + P.S. Dimapur, Nagaland, Pin- 797112 (Guarantor) nungi alanzüksütsü atema 20.03.2024 nü "Kong aliar yamaji", "Kechi aliar yamaji" aser "Yangji aliba ajak" basis nung ayoktsü.**

E-auction mode ajanga kiojen ayoktsü osang tejangja tküboklen agütsür:

Kiojen osang tejangja	Half Nagarjan, Dimapur Nagaland nung Mrs. N. Sashila Jamir tenüng nung aliba Equitable Mortgage of Land nung aliba ajak; Dag No. 187, Patta No. 65 Measuring 00B - 01K - 04Ls of Nagarjan Block, Mouza No. 03 Dimapur, Nagaland nung asür R. Nganshimongba'er jala Mrs. N. Sashila Jamir tenüng nung aliba Deed No. SD-721/05 dated 30.09.2019. North tsütsülen: Lingshi'er kimong, South tsütsülen K Shangreigam'er kimong, East tsütsülen: Toshi Lkr'er kimong aser West tsütsülen: Approach Road.
Encumbrances on property	Not known any
Reserve Price	~ 1,56,43,000/- (Rupees One Crore Fifty Six Lakh Forty Three Thousand Only)
EMD Amount	~ 15,65,000/- (Rupees Fifteen Lakh Sixty Five Thousand only)
Bid incremental amount	~ 10,000/- (Rupees Ten Thousand Only)
Date and time of e-auction	20.03.2024 from 01.00 pm to 05.00 pm.
Property ID No.	IDIB50502043373

Online bid nung shilem agitsü atema bid asütsüpurtemi onok indang auction service provider MSTC Ltd website (www.mstcecommerce.com/auktion/home/ibapi) nung reprangtsü akok. Technical teyari atema MSTC HELPDISK No. 033-23400020/23400021/23400022 aser service providers help desk nung aliba tanga helpline numbers ajanga nung metetpelatsü akok. MSTC Ltd den registration status atema ibapiop@mstcecommerce.com aser EMD status atema ibapifin@mstcecommerce.com ajanga metetpelatsü akok. Kiojen osang tejangja aser kiojen noksa den auction atema telatetbatemji <https://ibapi.in> nung reprangtsü akok aser iba portal nung mejangjabatem jangjashitsü atema help line number '18001025026' aser '011-41106131' ajanga metetpelatsü akok. Website den <https://ibapi.in> aser www.mstcecommerce.com nung kiojen bushiba mapang nung temalen shia aliba Property ID Number amshitsü bidders nem metetdaksür.
 Date: 29.02.2024
 Place: Dimapur
 Authorised Officer



TIR YIMYIM YIMOBILEM (EDITORIAL)

DIMAPUR TENTONÜ, MARCH (METSÜREMI) 04, 2024

Backward' tangatetba tasen ka

Tan Nagaland tatar senden amendang telemtetba tajung agiba rongnung kaji, Mokokchung district nungsa süaka Aor masü saka tangar kin, shirnok backward ta ajaba kintem rongnung densema lir, parnok nem Nagaland nung backward kintem nungdak reprangtsü asoshi tentetba Department of Under Developed Areas (DUDA) nungi teyari tangutsü tim agütsütsü ta lemtetbaji asütsü. Atangji, Nagaland nung aliba Naga kintem ajak ya India telongjem kübokbo 'backward' jenjang nung lir, ajisüaka 'backward' ta masü 'Scheduled Tribe' ta ajar. Anungji, India nungbo tangar temetetter aser tejakleni aoba kintem den mapa bushiba nunga aser tazünga nunga asenoki metoktepteter, anungji asenok ama ano shisa tenük junga melapoktet aliba kintem asoshi government mapa nunga aser tazünga maparen nunga menden balaka shiteta toktsür. Aji oda, Nagaland nung backward aser advance kin ta ana küma lemdangba ya, kasa backward rongnung telok ana küma lemsaba dang lir. Tsürabur jembibaren nungbo, advance akümba kintemji ango zür rongnunga mar shitetba ama ta asütsü südi. Ashiko, asenok aikati tang tashi Mokokchung district nung ya Ao kin dang yimtsüng kümteta kibur küma alir ta bilemtsüa akok, ajisüaka Langpangkong nung Chang aser Phom kin ana lir aser Jangpetkong nung Sema nung lir. Item rongnung tang Nagaland government-i lemtetbaji, Mokokchung district nungsa süaka Phom aser Chang nungertemjibo Tuensang aser Longleng district kübok alir Chang aser Phom nungertem nem DUDA ajanga 'backward tribe' tenüng nung kechi teyarisa balaka shiteta agütsür, item teyariji angutsü. Ibaji Nagaland asoshi aser talisa Mokokchung district asoshi temelenshi tajung ka tenzüker asütsü. Atangji, Mokokchung district ya Nagaland nungbo terenlok mapatem ajak nung tamapur, anungji tejakleni aoertem rongnunga mezünpur ta züngshiba kin aser district ka lir. Ajisüaka, Mokokchung district nung aliba Phom aser Chang yimtemji dang masü Ao yimtsüngtem nunga yim aika gari lenmanga junga maliba yimtsüngtem lir. Itemjibo tang tashi pei yim among adena aodang gari jajaba lenmang lenti matong tashibo taoba putu nung alir tsüraburtem ama pei khu pei kolak nung benloker tetsüng agi jajar. Aji oda, Delhi aser Kohima nung mena yur bilemba dang masü saka nüboritem aliba tensa tia jenjang reprangteta tanü putu den apet telemtetba agiba jaji Nagaland nung district ajak lirumedema renloktsü imlar. Tang state government-i Mokokchung district nung alir Phom aser Chang kintem nembo backward atema terenlok mapa inyaksü senotsü lemsükba nungi parnoka parnok yari kasa shilem lemsüktsütsü ta angatetba ama, joko state nung "Backward" ta asüba telok ya district aser kin apia masü saka kaketshisatsü junga mengutetba agi shisa tenük melapoki timtema alirtem, sensaker aser teküpbok tia nung aliba aser terenlok mapatem agi junga metongteti aliba **yimtsüngtem rongnungang 'backward' aser 'advance' telokji shitettsüla.** Aji oda, Mokokchung district nung Aor yimtsüngtem rongnunga temetetba, rongsen aser terenlok mapatem agi tangar memenepi alirtemji 'backward' telok nung tendaktsütsü akok aser tanga backward telok nung dena aliba district aser kintem rongnunga yimtsüng karbo 'advance' telok nung adentsüsa temetetba, akaba aser terenlok mapatem inyakba nung tangar menepa tejakleni oyaa alitsüa akok. Itemji kodang jungjunga asadanga bilemdangdir, atangji, backward kin nungi adokba kaketshir ka Delhi nung züngtetba o 'advance' kin nungi adokba kaketshir ka Nagaland nung pei kidang dang lia züngtetba na medemdangtsü makoktsü. Tenüng agi backward telok rongnung aden dang ashi, Delhi nung azüngbajisa tejakleni taoba aser temetetba asütsü. Aji oda, advance kin pur aika pei chirnurtem pei lima nung angati azüngdak government school aser college-ia meyoktet tim atemdang, backward nung adener kin chirnurtem aika bendanglen kaketreju tajung nung züngdakja alitsüa akok. Item ajakji alima yimya, anungji alima yimya denji medemdanga Nagaland nung 'backward reservation' sentong ya reprangshitsü nungdaker. Iba jaji , talisa, backward kintem rongnunga shitakba 'backward' jenjang nung alirtem ajangzüksü.

OLEMSABANG

14th FEBRUARY ASER YONGCHAK

- Temjentenzük Changkiri

Yongchak ya Manipur-len nungi adokba chiyungtsü tajung ka lir. Tanü asen Nagaland nunga aikati kanga sapua achir. Yongchak ya süngjanglijang kibong nung atongsemtsü südi. Onok college azüngba mapang Manipur nungi aruba ozü medemertemi iba chiyungtsü ya kanga sapua chia angudang, ni atema mezüngbuba yongchak chiyungtsü meteta akümba mapangji ibaji liasü. Hostel nung onok aikati iba yongchak ya chia tenzüker. Tangbo yongchak ya chibadoker joko küm 30 tema süia odaki! Yongchak ya achitsü tajung saka tezüknem sashira! Kodangsa ni yongchak den chiyunger mejanger aser anepdang saker metsümeshi südir, ni joko yongchak machitsü ta sa bilemer! Saka anogo süitema anü ai tashi nungbo yongchak densa chiyunga doker alir! Iba tapayutsü yongchak süngdong aser 14th February nung kü sarasadem indang kar lemsateper!

Ozü jabaso talakba pa class 12 ajanger Kohima Science College nung tenüng zülutet. Ano atongtepa NEET tatidang agütsütsü atema coaching centre nung tenüng zülutsü. Hapta ana süia aodang jabasoi anaprongla külemi agiba jaji pa kanga belemer ta tetsü küna dang shia, pai odia dang ana nungji ka dang agitsü ta lemsatep. Pa koba agitsü küna nungi telemtetba ka meshi. Sarasadema shisadanger küm ka 'gap' agia atar NEET-ji merangdangtsü atema ni jabaso nem telemtetba agütsü. Paia mulunga agizük aser B.Sc nung tenüng zülüokba meyipa agi. Jabasoi kanga sashia azüngtsü tenzüker, saka külen küna kanga shisabulutsü tenzüker! Jabaso dang nungi künaang temulungjang pokmatsü amai terata aser animesüngzükteni liasü. Joko Tsüngremji asen anisüngzükdak tajungtiba asünung, Pa dangi ano tali akanga meyip aser tamang ulushir sarasademsü tenzüker. Yamaji, anogoshia jabaso NEET tatidang nung takok ngudakjang ta sarasadema aru. Kidanger, kiyonger mesüra yimdong nung tangar dena o jembitsübjaja kanga dang kümdangasa jembia lia aruogo.

Iba amaji arudang ozü arogo nung mission hapta ajuru. Sentong nung aliba ama Pastori tenla sen meshitetba den külemi missionary-tem atema sarasadem. Nia mechioker temulung nung sarasademba mapang, kü mulungi sarasadem onük ka aru aser iba atemaji ni ola madoki temulung nung sarasadema liasü. Sarasadem temer kü temeshi laishiba tesülen tapak tazüng ka nung yamai zülüoka ayu: "Ni kü mulungjang nung jabaso (tenüng) medical missionary ka akümstsü atema Tsüngremi mulungra ataloktsü atema bendanga agüja sarasadema mepishia liasü. Nibo temepishir ka dang saka telemsarji Tsüngrem lir. Pai mulungba ama süangma. Amen." Iba anogoji 14th February liasü. Yamaji onoki akokba tashi aser sarasadem ajak agi jabaso nungita aru.

Iba mapang ozü atsü nung yongchak süngdong tulu ka liasü. Joko tejang atangtsüba mapanga süia küm aika arur saka tejang madangba yongchak süngdong ka liasü! Ni Tsüngrem dang kü tamang ajak agi iba yongchak süngdong ajanga jabaso sangküm NEET tatidang nung takok angutsü/mangutsü sayuang ta mepishi. Ozü jabaso shitakba takok angutsü asünungbo nai takümbo yongchak süngdong nung temaitsü ka ama tejang tangzuka sayuang ta Tsüngrem dang mepishi. Shisabulusetta sarasadema lia arudang, tesüngmangtsü ka künü ozü yongchak süngdong nung temeichi adoka angu! Aser melungi tejong tenet adoka topur junga naro temesüng apongtsü tenzüker! Tematiba Tsüngrem tenüng sanga liasü. Ya atangji, Tsüngremi ozüi mepishiba ama jabaso takok atema temaitsü sayuba lir ta agizük. Iba mapang nungi kodangsa yongchak teben apongba ngudir teti aseni tamang katetba Tsüngrem temeim bilemtetdaksür.

Kopi melie jabaso NEET tatidang agütsü, result adok aser Tsüngrem taochi agi pa state nung jenjang 6 buba nung takok ngutet. Ozü atsü nung aliba iba yongchak süngdong nung sangkümjibo tejang aika atangtsü ta yimlaa liasü. Küm ana asem atadanga lir tebena madok, tejanga matangba agi tangbo iba yongchak süngdong leptokogo! Iba yongchak süngdong ajanga Tsüngremi asaa dang Pa taküm aliba Tsüngrem lir, shirnoki amanger aser meshir parnok dang langzür ta jungai adoka sayuba lir ta ozüi amanger aser Pa nung sentsüwangshidaksür!

Ano tesüngmangtsü kaji ya liasü. Jabaso medical college nung admission agiba ajak tembanga arur, parnok mezüngbuba medical college nung class tenzükerba anogoji, 14th February liasü; pa college nung roll number 14; aser hostel nung mezüng ayipba taktangji room no. 14 liasü. Asen Tsüngrem ya atangji tesüngmangtsü Tsüngrem lir. Tesüiba küm mission anogo ni tenla kidang 14th February anogo nung sarasadema kü laishiba nung zülüoka ayudang to, Tsüngremibo sangkümji ozü jabaso iba kesa anogo nungji medical college nung mezüngbuba pa class nung dena, parnok college tenzükerba anogo asütsü ta meteta liasü! Ni amanger ano maneni Tsüngremi ozü sarasadem Pa mapang tetemsü nung langzüngtsü. Iba ocet ya Tsüngrem tenüng sentsüwangshidaksütsü atema zülüogo. Tazüngertem Tsüngremi moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jerusalem nung Armenian Khristantem meindoktsüa akok



Jerusalem kübok Armenian Quarter nung sentong ka agidang tangokba noksa nung angur.

March 03, 2024: Yirusalem nung ali tezüngzüktep ka agiba ajanga Yirusalem yimti tejenba nung akhidang nungi aliba Armenia nung Khristantem meindoktsüa tensa ka nung lir, ta bilema Yirusalem nung Arogo balala nungi lenirtemi iba tezüngzüktepji anema nokdaker.

'Cows' Garden' ta ajaba kimongji küm 98 atema developers Xana Capital Ltd nem 'lease' agütsütsü asoshi tezüngzüktep agia liasü.

Australia nung Daniel Rothman aser Palestine nung Khristan George Warwar na leniba nung Xana Capital Ltd-i iba tesem nungji luxury hotel ka asütsü.

Xana Capital Ltd-i ashiba agi, iba tezüngzüktep kübok aliba ali jagi Armenian Khristantem indang seminary ka, Armenian Arogo nung tongti indang atsüki den gari anendak

tesem ka aser Armenia nung kibongtem indang Quarter amshir.

Armenian Khristantemi, iba tezüngzüktep ya ozüing alema agiba lir aser iba tezüngzüktep ajanga Yirusalem nung Khristantem samatsütsü, ta ashir. Tanübo Yirusalem nung Armenian Khristan nütsüng 2,000 shi dang kümogo.

Aso 4buba mapang nungi aliba Armenian Khristantemi iba ali tezüngzüktep anema court nung dang masü saka social media ajanga-a raradar.

Yirusalem nung hotel ji yanglura Armenian district shilem 25 shi kongshitsü.

Greek Orthodox aser Roman Catholic densema Yirusalem nung aliba Arogotem nung tongti lenirtemi külem sangdong ka ajanga, iba tezüngzüktep agibaji ajanga Yirusalem nung Khristantem kongshitsü, ta metetdaksüogo.

"Developers-i asalentong yangluba ajanga iba tesem nung Armenia nung Khristantem samatsüa akok aser temeshi lima nung Khristantem jenjang tashi meiti akümtsü," ta parnokisa metetdaksü.

2021 küm July ita nung Yirusalem nung Armenian Arogo nung tongti leniri iba tezüngzüktepji agia liasü, ajisüaaka yaküm survey agirtem aruba mapang nung ang Arogo züngsemtemibo ibaji meteta liasü. Armenian Arogo nung tongti leniri jagi, pa dang yazü jembia liasü, ibayongji pai iba tezüngzüktep thitsütsü atema 'legal' tsütsülen nungi inyakdar, ta metetdaksü.

Armenia ya 301 küm Khristan yimsü agizükba mezüngbuba linük lir, anungji Yirusalem nung aliba Khristantem meyong temeshi tesemtem indang temedenji parnok atema-a kasa lir.

Burkina Faso nung Khristantemi asütsü melunga dang lir: Kientega

March 02, 2024: Burkina Faso nung Jihadist kiralongrartemi Khristantem anema inyaker, ajisüaaka Khristantemi pei yimsü atema asütsü metsübur, ta Arogo lenir kati metetdaksü.

February 25, 2024 nü Burkina Faso nung Tenla ki ka amakdang nisung 12 tepsetba sülen iba tatalokba

dak sendakba nung jembidang Burkina Faso kübok Ouahigouya Diocese nung tongti putir, Justin Kientega-i, kiralongra tatalokba balala ajanga nisung million 2 dak tema jenshiogo, ta metetdaksü.

Kientega-i, timtem aser reshikangshi liaka Khristantemi kiralongrartem metsübur aser pei yimsü atema asütsü-a melunga dang lir, ta metetdaksü.

Kiralongrartemi amokmerenyonga Khristantem aikati pei temang nungi Kangki agentsü memelunger; ano tesem kar nungbo Khristan



tsürtemi temeyipbangba sü agiyonga Islam yimsü dangi memeyiper, ta paisa metetdaksü.

"Linük nung reshikangshi liaka Khristantemi yamaji alitsü yimya sübar aser Arogo ainer. Aid to the Church in Need (ACN) nungi onoki nüngdakba teyari angur. Ajisüaaka tongtibangtibaji item kiralongrartem melungjang nung Tsüngremi jembitsü atema asenoki sarasademtsütsüla. Parnok temelung meyiptsü atema onoki anogo shia sarasademer," ta pai metetdaksü.

February 26 nü Burkina Faso nung Tenla ki ka amakdang nisung 12 asü. Oudalan province kübok Essakane yimyak Catholic Arogo Tenla ki amakba sülen Dori diocese nung tongti, Jean-Pierre Sawadogo-i, Amongnü Khristantem tekülem sentong tagidak mapang nung prangpong amer telok kati tamangertem

amakdang iba tesem nungjisa nisung 12 asü aser nisung asem mekümzükte hospital nung asü, ta metetdakja liasü.

Alima nung Khristantem alitsü linük tamajungtiba 50 rongnung Burkina Faso ya jenjang 20buba nung lir (Open Doors World Watch List).

Iba linük nung Islamic kiralongrartemi mapang shia Khristantem anema inyakba aser yimten tashi maitba ajanga Khristantem kanga timtemer.

Nütsüng million 24 shi aliba Burkina Faso linük nung Khristan nütsüng million 5.3 shi dang lir.

ANOGO ABEN TSÜNGREM DEN

Meimtsü angazükang

Medemeri medemer asoshi temeim nung aser nisung ajak asoshi temeim nung Kibubai nenok tali rena züindakjang.

Saka adianu meimtepba indang nenok dangi zülutsü tenüngdaksü maka, kechiaser medemer o medemer na meimteptsü Tsüngremi nenok dang sayur. 1 Tesaloknika 3:12; 4:9.

Tsüngrem temeim lir (1 Yn. 4:16). Pa yimyajji tabensa temeim lir, saka temenen yong Pa temeim Pa chirtem dangi teti yimya nung angati marur. Na temeim mesayuba kibong ka nungi iner alitsü akok. Nai meimba kar ajanga ne nem timtem agütsür alitsü akok aser tanaben iba timtem marudaktsütsü atema ne mulungjang meranga kümer alitsüa akok. Nai kar dang meima alitsü akok saka o nung aser mapa nung temeimji mesayuteti alitsü akok.

Pauli Tesalonika nung aliba Khristantem meimtepa alitsü zülu (1 Tesa. 3:7). Parnoki koda meimteptsü aji sayutsü Paul menüngdak, kechiaser Tsüngremi parnok dang meimteptsü sayutsü. Tsüngremi parnok nem Pa temeim agütsütsü aser parnoki Pa anidakdang, Pai iba temeimji parnok ajanga renlokaktsütsü. Parnoki kar dang memeimtetti lira Tsüngremi Tanela Temeshi ajanga parnoki meimdaksütsü.

Tsüngremi asenok tashi mait asoshi Pa taochi agütsür, aser asenoki tangar dang meimtsü renemdaksür. Idakji balaka kecha mali. Nisung tamajung danga meimtsü Tsüngremi sayur.

Nai kar dang meimtsü timtema bilemer asü? Tsüngremi na yaritsü. Pai nai ne tsürabur, kinüngbo- kinüngtsü, ne chirtem, ne tembartem, mesüra tsükchirtem meimdaksütsü. Nai ne temeim tetezü kaa mesayutetra, ibaji koda inyaksü Tsüngremi ne dang sayutsü. Temeim nung kiburji Tsüngrem lir. Na tangar den alidang temeim adokdaksütsü mesüra sayutsü Tsüngrem dang asüngdangang.

Chhattisgarh nung tribal Khristantem SC list nungi agentsü akhanger

March 03, 2024: adokdaksütsü atema kasa tasa Chhattisgarh state nung Hindu pusemba osangkaket ka ajanga tribal nisung 25 Khristan yimsü dangi meyipogo, ta sangdongba osangji tai, ta state nung Khristan lenirtemi metetdaksü.

February 29, 2024 nü RSS indang Organizer Weekly ajanga, Chhattisgarh state kübok Bemetra district nung tribal kibong pongu nungi züngsem 25 Khristan yimsü dangi meyipogo, ta sangdonga liasü.

Ajisüaaka Raigarh nung tongti putir, Paul Toppo-ibo, Lok Sabha election atongba mapang nung Hindu nung teloktemi iba ama yimtenren tasa ya amshir, ta metetdaksü.

State nung Hindu teloktemisa Khristan yimsü agizüker tribal nisungtembo Scheduled Tribe (ST) list nungi agentsüla aser sorkari teyari balala magütsütsüla, ta akhanger.

Osangbener den jembidang Paul Toppo-i, "Iba osang ajanga onok kecha mesüngmanger. Iba ya parnoki beshia aruba tasa lir," ta metetdaksü.

"Yaküm November ita nung Chhattisgarh assembly election agiba mapang nunga Hindu teloktemi kin aser tamangba yimsü nung ajemdaker telemsa

adokdaksütsü atema kasa tasa ya amshia liasü," ta paisa metetdaksü.

General election atongtsü mapang anasa Hindu pusemba party aser RSS-i yimsü nung ajemdaker telemsa adokdaksütsü atema inyaker, ta pai tai tongloksü.

Chhattisgarh nung anti-conversion ozüing kübok yimsü meyipba sentongtemji district ketdangsertem nem jelia metetdaksütsüla.

Organizer Weekly ajangasa tribal nisungtemi 2006 küm benokba anti-conversion ozüing alema inyaker, anungji parnok nem temerenshi agütsütsüla, ta akhang.

Khristan lenirtemi ashiba agi, Hindu teloktemi parnokji tribal nisungtem atema inyakertem ama sayur aser Hindu linük kümdaktsütsü atema tribal Khristantem anemer.

Paul Toppo-i, state assembly election agiba mapang nung Hindu teloktemi Khristan yimsü agizüker tribal nisungtem nem sorkar teyari magütsütsüla, ta takhangba agüja liasü, ta ashi.

Nütsüng million 30 shi aliba Chhattisgarh state nung nütsüng shilem 30 bo tribal nisungtem lir aser state nung nütsüng shilem 2 shi dang Khristantem lir.

AO OSHI ANGAZÜKDAK: TANÜ ANGAZÜKTSÜBA OJANG



Sormemeyip

(v) nisung maküm, yazü majung (immature)

* Tain akümyonga nisung aika sormemeyip shisatsü dena lir.

Soru

(v) jang agi chi küma asoba (to cook rice)

* Ojalai kinunger ajak chiyongtsü chi soru.

OLONG PAITEP # 6716

Grid for OLONG PAITEP # 6716 with numbers 1-17 in various cells.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rüzingdak - (3)
14. Tebang nungi adokba - (3)
16. Süngdong tatembangtiba - (5)
17. Meputip - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6715 TELANGZÜBA


TIPIEN :

- 2. Bangsemo, 6. Tiptem,
8. Jen, 9. Talila, 11. Aren,
12. Tzübo, 14. Alia, 16. Angati,
17. Odi, 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong,
13. Ajzüik, 14. Aitsü,
15. Tasa, 16. Aina.

NAI-A YA METETTER MA



Amul-i "Chaicrosoft: Amul-Gatesway To Taste" ta ser doodle ka sayaogo. Iba nung Microsoft co-founder aser philanthropist Bill Gates-i tawa Dolly Chaiwala den süngo marok ka ajemba ka sayua lir.

Iba animated version doodle nung Dolly Chaiwala-i Bill Gates nem süngo marok ka aser Amul butter den bread slice ana agüja sayua lir.

Dolly Chaiwala ya Maharashtra kübok Nagpur nung alir aser pai tesüba küm 15-20 shi ka süngo ayokba mapa inyaka arur.

Manipur Governor-i NE India Film Festival 2024 tenzüksü

Imphal, March 3, 2024 (Agencies): Manipur Governor Anusuiya Uikey-i mezüngbuba North East India Film Festival (NEIFF 2024) tenzüksüogo.

Imphal nung aliba Manipur State Film Development Society indang Palace Auditorium nung Deobarnü Governor Uikey-i benjung lapoktsü.

Iba benjungmong nung Assam nungi film 6 aser Manipur o Meghalaya nungi kaka sayutsü.

Best Director, Best Screenplay, Best Cinematography, Best Editing aser Special Jury Award dena telemsa 8 nungi takokertem shimtsü.

Iba benjung ya THOUNA, Manipur-i DIPR, Art and Culture aser Film Forum, Manipur den yaritepa ayongzüker. Maneni Ministry of Information and Broadcasting, Govt. of India-ia teyari agütsür.

Iba benjung ajanga film yanglurtemi art aser technical

qualities lemsateptsü maongka agütsür.

"North East India nung cultural aser artistic sempet aika lir aser temelenshi nüngdakba mapang loktiliba tajungba akümtsü atema film tajungtem yanglutetsü" ta Governor Uikey-i ashi.

Manipuri cinema kanga renloker aser mezüngbo 35 mm black and white films yanglu saka tanübo jenjang temabai tuogo, ta laisa ashi.

Tripura nunger sobaliba 'Risa' nem GI tag agütsüogo

Agartala, March 3, 2024 (Agencies): Tripura nunger sobaliba subotsü 'RISA' nem Geographical Indication (GI) registration agütsüogo.

'Tripura Risa' nem GI (Geographical Indication) Tag agütsüogo ta Tripura Chief Minister Manik Saha-i ashi.

"TRLM ajanga akungketba Killa Mahila Cluster nungi

artisans nem tenüngsang agütsür. Parnok ajanga 'Tripura Risa' nem GI (Geographical Indication) Tag agütsüogo. Iba ajanga asen subotsü alima nung tangari meteta akümtsü" ta CM Saha-i ashi.

Tripura Rural Livelihood Mission (TRLM)-i nungita Gomati District nung Killa Mahila

Cluster Level Federation (CLF)-i Geographical Indication (GI) kübok RISHA registration atema mapa inyak.

"Tripura Risa Textile" ya design balala nung ataker aser mapang talanglang alir. Iba sü ajanga Tripuri nunger art sayur. Tripuri tsürtemi loin loom ajanga Risa ataker aser sentsü balala enoka ataker.

2023 küm Assam nung anti-drugs operation tajungtiba inyak

Guwahati, March 3, 2024 (Agencies): Assam nung anti-drugs operations takok tulu ngua inyaktetbaji 2023 küm liasü ta Assam Chief Minister Himanta Biswa Sarma-i ashi.

Iba küm Rs 718 crore alang drugs apu aser nisung 4,700 tema pua liasü ta CM Sarma-i ashi.

Modi sorkari #DrugsFreeBharat akümtsü atema teyari tulu agütsür" ta

Sarma-isa ashi.

2023 küm Assam Police-i Rs 718 crore alang drugs apu aser drug shibelener 4,700 tema apu. Iba ajanga Assam nung anti-drugs operations takok tulutiba anguba küm südaktsüogo, ta paisa ashi.

CM Sarma-isa centre sorkari war on drugs dak sendakba maparen balala inyakba indang video ka lemsatep.

Guwahati nung nisung ana

ket nung heroin 500 grams bena aliba puogo, ta CM Sarma-isa ashi.

Assam Police special task force-i iba mapa inyak aser Guwahati nung STF-i kanga meranga anidakba sülen nisung anaji apu, ta paisa shisem.

"Tena aliba kidang mita aodang sapon pongdang 34 nung heroin gram 500 enoka aliba angu" ta Assam CM-isa metetdaksü.

Advertisement for Punjab National Bank featuring a 'SALE NOTICE FOR SALE OF IMMOVABLE PROPERTIES' and a 'SCHEDULE OF THE SECURED ASSETS' table with columns for SL. No., Name of the Branch, Description of the Immovable Properties, etc.

Trump-i Republican nomination angutsü anameta nung lir



Richmond, Metsüremi/March 03 (Agencies): Honibarnü Donald Trump-i Republican presidential candidate asoshi toktepa tesem aika nung takok ngua November ita US tir election atema party candidate takumer lir.

Taoba tiri Missouri, Michigan aser Idaho primary nung kanga juga takok angu aser tang tashinung vote agüja aliba states ajunga nung pai maneni takok angur.

Arishi küm 77 tain Trump-i Virginia nung rally ka nung pa bhukumer den jembidang pa

Republican nomination atema rocket ka nung otar ta ashi.

Taruba hopta-a paisa takok angutsü amai lir.

Pa den tang tashi tokteper taoba South Carolina Governor Nikki Haley ya tang tashi state kata nunga takok monguteti lir aser la teimla kangabo mangur.

Pai Missouri aser Idaho nung aliba delegates ajunga akoktsü takzüteta lir aser Michigan nunga tanungba ajak angutsü. Iba state nung hopta tetenzüklen delegates tasembuba pai nguteta liasü.

Delegates tem ya pei state mesüra district nung party

indang national convention nung shilem agir aser presidential nominee atema telemtetba parnoki agir. Tang tashinung Trump-i Republican delegates 247 ngutetogo aser Haley-i 24 dang nguteta lir.

Honibarnü Virginia yimtiba Richmond nung nisung meyrirjang aika Trump jembiba angatsü ghonda aika ata liasü. Pai Mongulbarnü takok tulu angutsü nangzük, aser iba anogo states 15 nung presidential candidate shimtsü.

Trump-i US aser Mexico arütsü shibangtsü onük nung akang-akanga soita lir aser taoba hopta iba arütsü semdangba sülen pai Biden tenüng sena liasü.

"Taruba election nung vote angutsü atema Biden aser par teloki arütsü lapoka yuner, aser ibaji ajanga shidakba America nung putu aika amokbangtsü," ta pai ashi.

Honibarnü New York Times aser Siena polls sayaba nung America nung shilem 48-i Trump nem vote agütsütsü aser shile 43-i Biden nem vote agütsütsü ta sayur.

Ukraine nungi yokba drone 38 Russia-i raksatsüogo

Moscow, Metsüremi/March 3 (Agencies): Deobar anepdang Crimean Peninsula amaktsü yokba Ukraine nung indang drone 38 Russia indang air defence system-i raksatsüogo, ta Russia indang defence ministry-i metetdaksü.

Feodosia rongnendak ola tulu adoka apokba osang Ukraine aser Russia indang social media nung osang agütsüba sülen ministry-i iba osang metetdaksa liasü.

Russian defence ministry-i, iba lendong nung nisung asüba mesüra osettsüt rekasaba indang osangbo kecha magütsü.

Feodosia nung gari senzüsenpongtsü atema tenokdangba agütsür lir, ta Crimea nung Russia-i amenoktsüba ketdangsurtemi shir liasü. Crimean Peninsula aser Russia na sendaktepa apu nung gari senzüsenpong ghonda ana shi sota liasü aser 0140 GMT nung tenzükshi, ta Crimea nung ketdangsurtemi Telegram ajanga metetdaksü.

Russia aser Ukraine indang social media nung Feodosia

nung alirtemi Deobar anepdang 2:00 ako nung rongnendak aser oil depot anasa ola tulu adoka apokba angashiba indang metetdaksa liasü.

Crimean Peninsula koba Russia-i 2014 küm Ukraine ket nungi rakzüka liasü, iba tesem ya linük ana tsünga küm ana tashi raraba mapang kanga tongtibang tesem ka kümogo.

Crimean nung Ukraine-i drone tem amshia amakba mapang Russia indang military tamendakdak aika raksatsüba den Sevastopol nung rong aser rong yangludak balala raksatsüogo.

Kasa mapang nung Moscow-i, Black Sea nung parnok indang rongtem amshia Ukraine nung tesem balala maka arudar.

Ukraine Tir Volodymyr Zelenskiy-i ashiba agi, Ukraine nung sepaitemi Black Sea nung Moscow indang military tashi tajemba kümdaktsüogo. Paisa, Kyiv den sendaktepa aliba linüktemi maneni teyari agütsüra parnoki jenjang tuluba agitettsü aser Russia madak takok angutsü, ta ashi.

Israel-Gaza rara nung ceasefire atema teimla ka angur

Cairo, Metsüremi/March 03 (Agencies): Hamas telok nungi ketdangsurtem telok ka Egypt yimtiba Cairo tonga aruogo, anungji Israel-Gaza rara nung ceasefire alitsü teimlar sayur.

Israel-ibo iba tezüngzüktep mulunga agizükba den kasa jenjang nung lir ta US ketdangsur kati ashi.

Hopta trok atema rara anena ataba ajanga Israel nung pua bener oa alirtem aser Palestine nung tepuokdak yua alirtem chiochtsü ta US-i ashir.

Brehostibarnep Gaza City tezülen aid convoy ka alidaki nüburtem arsanga aodang nisung 112 tepsetba sülen iba tezüngzüktep yanglutsü atema tesem balala nungi tali ajungshir.

Civilian tem chiyongtsü agizüktsü merang dang Israel sepaitemi injang khaloktsü ta Hamas-i tai tonglochtsü. Israel-i aji magizüker aser par sepaitem anasai arur nisung kar dak akha aser timba parnok nungtep dang ajemset ta Deobarnü ashi.

Qatar den külemi yimjung ken o jembir Egypt ketdangsur temi ashiba agi, iba ken o jembiba nung Hamas aser Israel nungi ketdangsurtem adentsü imlar.

Khen atema rara anena atatsü asoshi ghonda 24 nungi 48 tsünga tezüngzüktep ka agitsü akok ta Hamas-i ashi aser parnoki akangba nung Israel-i mulungba dak keta lir ta Egypt nung osangbener dang ashi.

Israel-ibo hopta trok ceasefire atema framework ka yangluba agizükogo, ta US ketdangsur kati ashiba sülen iba

teimla ya arur.

Hamas telungpuri Israel south tsütsü amakdang nisung 1,200 shi tepseter nisung 253 pua bener aoba sülen Israel mitkari Hamas samatsütsü meranga anüng aser alilen nungi amak tenzük.

Gaza nung Hamas meyong health ministry ajanga ashiba agi, Gaza nung tang tashinung tanur aser tetsür 21,000 densema nisung 30,410 tepsetogo aser nisung 7,000 samar bushir aser nisung 71,700 yirua lir.

Gaza north tsütsü ayawara arutsü akok ta teyari agütsüba lokti tentet balala nungi tekumdangtsü ashiba sülen ceasefire alitsü asoshi ajungshiba tali akum.


Brehostibarnü iba aid convoy lendong sülen US-i Gaza atema tayimtsü amshia humanitarian aid Honibarnü mezüngbuba tsükdaktsü aser iba mapang mitkar indang tayimtsü asem nungi chiyongtsü 30,000 dak tema parachute amshia tsükdaktsü.

Kasa mapang Israel-i ashiba, Gaza south tsütsü Khan Younis nung tayimtsü amshia amak. Iba lendong nung asü-amaba osang memetet.

Honibarnü Gaza south tsütsü Rafah nung aliba refugee camp ka nung Israel-i tayimtsü amshia amakdang nisung 11 asü ta Hamas-i ashir.

Rafah refugee camp amakba atema World Health Organization chief Tedros Adhanom Ghebreyesus-i aitsü saka Israel mitkari yangji Islamic Jihad telungpur alidak mezüng-mezünga amak ta ashir.

Shehbaz Sharif tanaben Pakistan ato kilonser kümogo



Islamabad, Metsüremi/March 3 (Agencies): Pakistan nung legislator temi linük ato kilonser mapa abentsü atema Shehbaz Sharif shimogo. Pa tang agi tanaben buba ato kilonser kümogo. Taoba ita mepetmesü tulu nung election agiba sülen tang MP temi linük anitsü asoshi lenir ya shimogo.

South Asian nung aliba linük nung ya February 8 nü general election agia liasü, koba results menro sangdongba amala mepetmesü agi sünga liasü. Deobarnü parliament lower house koba dang National Assembly tang ajar iba house züngsemtem ajurutepa Ato Kilonser shimtsü atema election agiogo.

"Islamic Republic of Pakistan Ato Kilonser mapa abentsü atema Shehbaz Sharif shimogo," ta National Assembly Speaker Ayaz Sadiq-i ashi.

National Assembly züngsem 336 nungi Shehbaz-i vote 201 ngua election ayong ayonga kokogo. Pai Omar Ayub Khan tsükdakja liasü, shiba vote 92 angu. Iba election akoktsü atema tetokeper kati vote 169 nüngdaker.

Khan nem Sunni Ittehad Council (SIC)-i teyari agütsü, kong taoba Ato Kilonser Imran Khan-i aniba Pakistan Tehreek-e-Insaf (PTI) party nungi legislator tem densema lir. Election ozüng alema inyaksangshiba atema PTI party ya election nung

tokteptsü atema tenokdangba agütsüba sülen parnok SIC den dena liasü.

Arishi küm 72 tain Sharif ya taoba küm August ita tashi Ato Kilonser liasü. Iba ita National Assembly loksa caretaker sorkar ka nem national election agitsü atema lenmang lapokja liasü.

Shehbaz ya PM aseben tashi bener alisang Nawaz Sharif tenu lir, shibai Pakistan Muslim League-Nawaz (PMLN) party nguteta liasü. Parnoki Pakistan Peoples Party (PPP) den longjemer sorkar kümtetogo. Shehbaz ya ano PMLN Tir lir.

PTI-i teyari agütsüba SIC party züngsemtemi ochi mashi inyakyim anema Shehbaz PM mendeni atu ta yimyim ayima longkak aitba sülen Deobarnü National Assembly session menor tenzüka liasü.

PTI pur election symbol mamshiteti akümba sülen parnok candidate tem independent ama election nung toktep aser parnoki menden 93 koka party ajak dang nungi menden timba akok. Party-i, parnok nem parnok angutsü tim magütsü ta shia yimtung nung longkak ait tenzükogo.

PTI lenir Khan shiba 2022 küm PM menden nungi atsüntoka liasü, pa ken o balala nung aija taoba küm August ita nungi tepuokdak yua lir.

LAND FOR SALE
 Behind Sovima Cricket Stadium
 RATE Rs. 490/- per Sq.ft.
 ANY SIZE AVAILABLE
 - Price Negotiable -

CONTACT
 8974020568

NBA: LeBron James-i otsü tasen ka yangluogo



Metsüremi/March 3, 2024 (Agencies): Honibarnü Denver Nuggets den asayaba mapang LeBron James-i pa indang career nung regular-season points 40,000 idaktsüba sülen pa NBA asayartem rongnung iba alizüing tongtetba mezüingbuba asayar kümogo. Ajisüaka pai iba alizüing

tongtetba ya tepelatsü aser tejashitsüka lir ta ashi, kechiyong par team-i iba asaya 124-114 agi mekoki liasü.

"Iba league nung alizüing tasen ka tongtetba mezüingbuba asayar akümba ya jangrademtsüka," ta arishi küm 39 tain asayar yagi ashi, shibai iba asaya nung point 26

idakja liasü.

James-i tanabuba quarter atemtsü minute 10 aser second 39 anunga lia score asüba sülen iba alizüing tongteta liasü.

Iba sülen asaya reprangertemi James nem tetushi agütsü aser iba alizüing tongtetba mapang amshiba ball agina liasü.

Ajisüaka iba asaya ya Nuggets puri koka liasü aser iba ajanga James mepelai liasü.

"Ajak dang tongtibangtibaji asaya akoktsü atema lir aser tamakok anguba asaya ka nung iba ya atalokba atema kanga mepelar," ta pai ashi.

Kasa mapang nung James-i 2023 küm February ita Kareem Abdul-Jabbar ajateta NBA nung points timtiba indaktsüba asayar aküm. Jabbar-i points 38,387 idaktsür liasü.

Pai NBA championship pezüben kokogo aser Most Valuable Player naroküm pezüben tashi agizükogo. Pa tang season 21buba asayar aser league nung asayar tambusang lir.

Himachal nungi Veteran Atasayar 6 WMAC nung asayatsü

Metsüremi/March 3, 2024 (Agencies): Himachal Pradesh nungi veteran asayar trok World Masters Athletics Championships nung asayatsü renema lir, kong Hamirpur nungi long distance runner Surinder Singh Dehal densema lir.

Iba asayamung ya Gothenburg, Sweden nung August 13 nungi 25 tashi asayatsü.

World Masters Athletics Championships ya küm ana nung khen asayar, kong World Masters Athletics tawabangba

kübok arishi küm 35 aser tema aliba masters asayartemi shilem agir.

"Iba ya state asoshi tepelatsü lir. HP nungi asayartemi February 13 nungi 17 tashi Pune nung 44buba National Master Athletics Competition nung kanga junga asaya medal 18 nguogo," ta Masters Athletics Federation Himachal Pradesh Tir Ripudaman Kaushik-i Deobarnü ashi.

Dehal (10,000m) and Ashwini Kumar Sharma (1500m and 2000m

steeplechase, 800m) na arishi küm 65 temapur asayaba category nung tokteptsü.

Kasa mapang nung Harish Kumar (triple jump), Dwarika Thakur (1500 meters & 5000 meters) aser Brijlal Thakur (100m & 300m hurdles) nunger arishi küm 60 aser temapur toktepba category nung tokteptsü atema shimogo.

Maneni Bhishan Singh Chauhan, discus throw, javelin throw aser shot put asaya nung tokteptsü. P arishi küm 55 aser temapurtem toktepba category nung tokteptsü atema shimogo.

Italy aser Turkey lungjemer UEFA Euro 2032 ayongzüktsü

Metsüremi/March 3, 2024 (Agencies): Italy aser Turkey dang 2032 European Championship külemi ayongzüktsü asüingdangogo aser 2032 küm iba asayamung ayongzükner linük ana ya dang lir, ta UEFA ajanga ashi.

Football federations ana ya iba asayamung ayongtsü raktepa liasü, koba UEFA executive committee züingsemtemi vote agütsütepa liasü.

Team 24 aser asaya 51 atema küm toku jelia linük ka nem benzüka agütsüba nung UEFA timtem ajurutsü saka linük ana ya lungjemer ayongzükra kanga tayongba asütsü.

Italy-i stadium tem yanglutsü aser yanglushitsü nungdaker. Milan nung aliba

San Siro stadium melentsü ama Italy nung asayaba tesem yanglutsü ya kanga meilongi agütsü.

Turkey yabo stadiums aser ki o jen ajunga amai renema liasü, kechiaser Tir Recep Tayyip Erdogan lenisüba kübok küm ter tsüingta linük nung jisü-jensü mapa jenti inyaka liasü.

Turkey yagi küm 20 tashi iba asayamung ayongtsü meranga arur, saka taoba küm Istanbul nung Champions League final asayadang Manchester City fans temi senzüsempingba nung timtem ajuruba sülen tasüingdangba arur.

Team 24 aliba asayamung ayongtsü asoshi nungdakba ajak peritsü atema federation ana den inyaktsü, ta UEFA ajanga ashi.

Turkey ya ano Euro Cup 2028 asayamung ayongtsü

asoshi meranger, ajisüaka iba küm atema United Kingdom nungi federation pezü aser Ireland linüktemia ayongzükner.

Spain-Portugal nati 2023 World Cup ayongtsü merangba nung tokteptsü asoshi Europe nungi UK aser Ireland ya candidate tajung liasü saka iba sentong tatem kati aruba sülen linük ana yagi Euro 2028 nung rangloker. 2030 World Cup ayongzüktsü asoshi Morocco aser Ukraine linüktema tejangraba lir aser iba atema FIFA-i 2024 küm tatemlen vote agiteptsü.

Euro Cup anaprong atema UEFA-i telemtetba ka Nyon nung agia liasü.

Euro 2024 ya Germany kisüingi ayongtsü, aser iba atema 2018 küm September ita vote agitepba nung mela-mela Turkey madak takok angu.

World Test Championship nung India No. 1 kümogo

Metsüremi/March 3, 2024 (Agencies): Deobarnü Wellington Test nung Australia-i New Zealand madak takok anguba sülen International Cricket Council (ICC)-i update asüba World Test Championship (WTC) points table nung India temaba jenjangi tuogo.

India team-i points percentage 64.58 nguteta World Test Championship (WTC) points table nung parnok temaba jenjangi tuogo aser tanabuba jenjang nung New Zealand lir, parnok indang point percentage 60.00 lir.

Team ana sülen Australia team tasembuba jenjang nung lir. Parnok indang points percentage 59.09 lir. Australia team-i New Zealand den tang Test asayamung asaya aliba nung mezüingbuba Test run 172 agi kokogo.

Kasa mapang nung England aser India na tang Test asayamung ka tasayadak lir

aser tang tashi nung India-i asaya asem aser England-i asaya ka koka lir.

Kasa mapang nung team ana tsüingda Dharamsala nung March 7 nü nungi tenzüka asayatsü aliba pongububa aser tatembangbuba Test asaya India-i kokra parnok WTC table nung maneni tejakdangi atutsü.

Tang asaya aliba WTC cycle nung India team Test ti asayar lir aser Rohit Sharma-i aniba team yagi Test pongu kokogo, ana makok aser ka draw süa lir. Tang tashi nung Australia team-i Test timba (11) asayar lir

WTC points system nung takok anguba shia point 12 agütsür, tie asüba atema point 6 aser draw asüba atema point 4 agütsür. Ajisüaka team tem ya points percentage dak ajemdaker rank agütsür.

Cycle tembanga asayaba sülen temaba jenjang nung tembangba team ana final Lords nung asayatsü.

Alex De Minaur-i ATP Acapulco Open kokogo



Tsüklai/February 3, 2024 (Agencies): Australia nunger asayar Alex de Minaur-i Honibarnü ATP Mexican Open final nung Norway nunger asayar Casper Ruud 6-4, 6-4 agi koka iba asayamung küm anabuba atonga kokogo.

Arishi küm 25 tain Sydney nungi asayar ya final pezü atonga tamakok anguba sülen tang iba asayamung koka pa indang career nung ATP title tibuba benogo. Pai taoba küm iba asayamung final nung America nunger asayar Tommy Paul koka liasü.

World number 9 asayar de Minaur, shibai Atlanta nung asayamung ana tashi koka lir, pai world No 11 asayar Ruud ya final nung ghonda ka ser minute 57 nung koka liasü. Tena tang tashi nung anaben asaya lir aser anabenprongla Minaur-i kokogo. Pai 2019 küm ATP NextGen Finals nunga Ruud madak takok ngua liasü.

Ruud, shiba French Open

nung anaben tashi runner-up aser 2022 US Open nunga runner-up lir, pa taoba hopta Los Cabos Open final nung Australia nunger Jordan Thompson-i tsükdaktsüba sülen iba asayamung nunga tsükogo. Pa ATP title 11buba abentsü atema meranga asayaba mapang ka lir.

Ruud-i tatemsa taoba küm April ita Estoril nung ATP title ka bener lir.

Asaya tembangba sülen asaya ana kati ka tenüingsangtepa liasü aser Rudd-i, "hopta tepeyong kanga junga asayaogo aser tanü jungrara asayaogo. Acapulco nung na jangradema asayar ama reprangteter. Nai kanga junga asayaogo," ta Minaur dang ashi.

Kasa mapang nung De Minaur-ia, "kanga junga asayaogo aser asaya akoktsü atema kanga meranga asayatsüsa aküm. Jangradema asayadaktsüba atema kanga pelar," ta Rudd dang ashi.

BILEMDANGANG

"Pei meit mazuoktetertemi aiben timtemi ajangshir."